


唐十二家詩集

駱賓王

叁



			三八八	漢書門
一	九	〇	八	
〇	三	八	八	
冊	架	函	號	類

庫文閣內			
三	三		漢
九	八		書
函	〇		
二	一	八	
〇	〇	八	
架	冊	號	類

內閣文庫	
番號	漢 3808
冊數	10 ( 3 )
函號	319 141





書齋  
館印

日  
書齋  
印

駱賓王集目錄

賦類  
并序  
燈火賦

五言古詩

夏日遊德州贈高四

詠懷古意上裴侍御

七言五詩

帝京篇

行軍軍中行路難

淺草文集

蕩子從軍賦

在江南贈宋五之問

疇昔篇

行路難



艷情代郭氏答盧照鄰

代女冠王靈妃贈道士

五言律詩

在獄詠蟬

并序

遊紫雲觀贈道士

渡瓜步派

途中有懷

至分水戍

望鄉夕汎

久客臨海有懷

西京守歲

遊兗部寄孔君

白雲抱幽石

春雲處處生

秋日送陳文林陸道士

同辛簿簡仰酬思玄上人林泉

四首

送鄭少府入遼

送費六還蜀

秋日送侯四

秋日送尹大赴京

秋夜送闍五

送王明府上京參選

秋日送別

別李嶠

在兗州餞宋五之問

遊靈公觀

夏日遊山家同夏少府

初秋司馬樓宴

初秋於六宅宴

冬日宴

饑雞子

詠雲酒

詠美人在天津橋

憲臺出紮寒夜有懷



送郭少府

餞駱四 二首

冬日過任處士書齋

塵灰

秋晨同淄川毛司馬秋色九詠

詠水

詠鴈

詠雪

王昭君

樂大夫挽詞 五首

丹陽刺史挽詞 五首

送劉少府遊越州

從軍行

稱心寺

出石門

同潤州薛司空丹徒桂明府遊招隱寺

至分陝

北眺春陵

夏日遊目聊作

同崔駙馬登樓思京

月夜有懷簡諸同病

春夜常明府宅宴

送宋五之問

五言排律

浮槎 并序

春霽早行

晚度天山有懷京邑

晚泊河曲

晚泊蒲類津

早發淮口望盱眙

遠使海曲春夜多懷

早發諸暨



過張平子墓

海曲書情

邊城落日

蓬萊鎮

宿溫城望軍營

和孫長史秋日卧病

早秋出塞寄東臺詳政學士

四月八日題七級

鄭安陽入蜀

在軍中贈先還知己

和李明府

望月有所思

送吳七遊蜀

西行別東臺詳政學士

春晚從李長史遊開道林故山

和王記室從趙王春日游陀山寺

冬日野望

夕次舊吳

過故宋

秋日山行簡梁大官

晚泊江鎮

晚渡黃河

晚憇田家

宿山莊

夏日憶張二

寓洛對雪憶謝二

叙寄負半千

靈隱寺

寒夜獨坐遊子多懷簡知己

傷祝阿王明府

詠懷



邊夜有懷

幽禁書情通簡知已

五言絕句

在軍登城樓

送別

挑燈杖

翫初月

七言絕句

憶蜀地佳人

久戍邊城有懷京邑

棹歌行

易水送別

詠照鏡

詠塵

雜言詠鵝

駱賓王集

賦

螢火賦

并序

江東孫伯履公素校

余猥以明時久遭幽禁見一葉之已落知四運之將終悽然客之為心乎悲哉秋之為氣也光陰無幾時事如何大塊是勞生之機小知非周身之務嗟乎縑袍匪舊白首如新誰明公治之非孰辨臧倉之勳是用中宵而作達旦不瞑覩茲流螢之自明哀此覆盆



之難照夫類同而心異者龍躡歸而宋樹伐質殊而  
聲合者魚形出而吳石鳴苟有會於精靈夫何患於  
異類况乘時而變含氣而生雖造化之不殊亦昆蟲  
之一物應節不憊信也與物不競仁也逢昏不昧智  
也避日不明義也臨危不懼勇也事有公情而動興  
因物而多懷感而賦之聊以自廣云耳

伊玄功之布氣有丹鳥之賦象順陰陽而亭毒資變  
化而涵養每寒潛而暑至若知來而藏往既發揮以  
外融亦含光而內朗若夫小暑南收大火西流林塘

改夏雲物迎秋忽凌虛而赴遠乍排叢而出幽灼火  
齊之宵映如夜光之暗投逝將歸而未返忽欲去而  
中留入槐榆而燄發若改燧而環周繞堂皇而影泛  
疑秉燭以嬉遊點綴懸珠之網隱映落星之樓乍滅  
乍興或聚或散居無定所習無常翫曳影周流飄光  
凌亂泛艷乎池沼徘徊乎林岸狀火井之沉熒似明  
星之出漢值衝颺而不烈逢淫雨而逾煥炤灼兮若  
湛盧之夜飛灼爍兮像招搖之夕爛與庭燎而相炫  
然重陰於已昏共爝火而齊息避太陽於始旦爾其



光不周物明足自資偶仙鼠而伺夜對飛娥之赴嬉  
類君子之有道入暗室而不欺同至人之無迹懷明  
義以應時處幽不昧居照斯晦隨隱顯而動息候昏  
明而進退委性命兮幽玄任物理兮推遷化腐木而  
含彩集枯草而藏煙不貪執以苟進每和光而曲全  
豈如鎔金而自鑠寧學膏火之相煎陋蟬蛸之習甄  
沐螻蟻之慕羶匪傷蜉蝣之夕不羨龜鶴之年捨榆  
飛而控地搏扶起而垂天雖小大之殊品豈逍遙之  
異筌夫何化之斯化無使然而自然若乃有來斯通

無往不至排朱門而獨遠昇青雲而自致匪偷光於  
鄰壁寧假輝於陽燧終狗已以致能靡因人而成事  
物有感而情動迹或均而心異響必應之於同聲道  
固求之於同類始未明於趨捨庸詎識其指意子惠  
不知魚之為樂吾又安能知螢之為利高明兮有融  
遷變兮無窮牛哀倏而化虎羽泉忽兮生熊血三年  
而藏碧魂一變而成虹知戰場之有燐晤寃獄之為  
蟲彼翺飛之弱質尚矯翼而凌空何微生之多躋獨  
宛頸以觸籠異璧光之照廡同劔影之埋豐覲道迷



而可復庶幽鑒而或通覽光華而自照顧形影以相  
弔感秋夕以殷憂歎宵行以熠燿熠燿飛弓絕復連  
殷憂積弓明且煎見流光之不息愴驚魂之屢遷如  
過隙弓已矣同奔電弓忽焉儻餘光之可照庶寒灰  
之重然

蕩子從軍賦

李空同謂此不類賦體當  
作歌行為是觀者詳之

胡兵十萬起妖氛漢騎三千掃陣雲隱隱地中鳴戰  
鼓迢迢天上出將軍邊沙遠離風塵氣塞草長萎霜  
露文蕩子辛苦十年行回首關山萬里情遠天橫劍

氣邊地聚笳聲鐵騎朝常警銅焦夜不鳴抗左賢而  
列陣屯右校以疏營滄波積凍連蒲海雨雪凝寒遍  
柳城若乃地分玄徼路指青波邊城暖氣從來少關  
塞寒雲本自多嚴風凜凜將軍樹苦霧蒼蒼太史河  
旣拔距以從軍且揚麾而挑戰征旆凌沙漠寒衣犯  
霜霰樓船一舉爭沸騰烽火四連相隱見戈文耿耿  
懸落星馬足駸駸擁飛電終取俊而先鳴豈論功而  
後殿征夫行樂踐榆溪倡婦銜怨坐空閨靡蕪舊曲  
終難贈芍藥新詩豈易題池前怯對鴛鴦伴庭際羞



看桃李蹊。花有情而獨笑。鳥無情而恒啼。蕩子別來  
年月久。賤妾空閨更難守。鳳凰樓上罷吹簫。鸚鵡杯  
中寧勸酒。聞道書來一鴈飛。此時絨怨下鳴機。裁鴛  
帖。夜被薰麝染春衣。屏風宛轉蓮花帳。窓月玲瓏翡  
翠帷。箇日新粧如復罷。祇應含笑待君歸。

靈泉頌

并序

聞夫玄功幽贊靈心以有德是親至道冥符篤行以  
通仁為本若乃天經地義色養叶於因心夏清冬溫  
愛敬弘於錫類下建六幽之奧上洞三光之精不有

至誠孰云斯感有廣平宋思禮字過庭皇朝永州刺  
史昉之嫡孫戶部員外頤之長子幼丁偏罰早喪慈  
親永懷鞠養之恩長增思慕之痛弱不好弄長而能  
賢趨庭聞詩禮之風永宗勗曾閔之行事後母徐以  
至孝聞吐面興悲泣高堂而咎已東遊下位干微祿  
以逮親調露二年來佐百里俯就微班之列將申返  
哺之情敬立身其若斯於從政虐何有時歲亢旱金  
石行銷環近川原殆將煙絕濬井皆為湯谷通波盡  
化污池太夫人在遲暮之年有溫勞之疾非濫漿不



可以適口非源泉不可以蠲痾色養既虧憂惶靡訢  
俄而廳階之下忽清泉而自生因疏導其源遂流注  
不竭味甘若醴氣冷如冰此邑城控剡山地連禹穴  
基址多石岡阜無津爰自興建已來曾微穿汲之利  
非精誠貫於有道純志浹於無私孰能治冥貺以通  
幽導靈泉而致養者也昔漢臣忠烈窮井飛於一言  
姜婦孝思潛波移於七里靜惟陳迹彼亦何人蕭縣  
尉柳晃耿介之士也道義則金蘭若膠漆清異則軒  
冕猶埃塵片善可嘉朝聞甘於夕死一諾猶重黃金

賤於白圭以為執友素交豈祿利輕肥之謂也賞者  
達禮非鐘鼓玉帛之云乎所耻者歿而無稱所貴者  
存乎不朽徒懷美志未遇良材某出贊荒隅途經勝  
壤三秋客恨長懷宋玉之悲一面交歡整雪桓譚之  
涕觀斯水之清泚感若人之精誠見賢思齊仰珪璋  
而有地揮毫興頌鏤琬琰之無慙乃作頌曰  
粵若稽古厥初生民其誰不孝獨我難倫義不存道  
仁不遺親愛敬盡力孝悌通神  
頌我恩極因心感至冥契動天甘泉湧地泠泠無竭



蒸蒸不匱曾是我思永錫爾類

爰有芳人景行勞塵事諧則感通洽斯親孝為禮王  
名是實賓儻斯文之不墜知盛德之有鄰

五言古詩

夏日遊德州贈高四

并序

夫在心為志發言為詩詩有不得盡言言有不得盡  
意僕少負不羈長逾虛澹讀書頗存涉獵學劍不待  
窮工進不能矯翰龍雲退不能棲神豹霧撫循諸已  
深覺勞生而太夫人在堂義須捧檄固仰長安而就

日赴帝鄉以望雲雖文闕三冬而書勞十上嗟乎入  
門自媚誰相謂言致使君門隔於九重中堂遠於千  
里既而交非得兔路是亡羊幸嘗敬止敝廬竭來初  
服遂得載披玉葉欵洽金蘭傾意氣於一言締風期  
於千祀雖交因契合資得意以敦交道契言忘少寄  
言而筌道是以輕投木李以代踈麻章句繁蕪心神  
媿恧庶瞻雅韻竚辱報章則覬耀連星開龍文於劍  
匣素輝虧月頻驪頷於珠胎云爾

日觀隣全趙星臨俯舊吳隔津開巨寢稽阜鎮名都



紫雲浮劔匣青山孕寶符封疆恢霸道問鼎競雄圖  
神光包四大皇威震八區風煙通地軸星象正天樞  
天樞限南北地軸殊鄉國闢門通舜賓比屋封堯德  
言謝垂鈞隱來參負鼎職天子不見知群公詎相識  
未展從東駿空戢圖南翼時命欲何言撫膺長歎息  
歎息將如何遊人意氣多白雲梁山曲寒風易水歌  
泣魏傷吳起思趙切廉頗淒斷韓王劔生死翟公羅  
羅起翟公意劔負韓王氣驕餌去易論忌途良可畏  
夙昔懷江海平生混涇渭千載契風雲一言忘賤貴

去去訪林泉空谷有遺賢言投爵里刺來泛野人船  
締交君贈縞投分我忘筌成風郢匠斷流水伯牙絃  
牙絃忘道術漳濱恣閒逸聊安張蔚廬詎掃陳蕃室  
虛室狎招尋敬愛混浮沈一諾黃金信三復白珪心  
霜松貞雅節月桂朗冲襟靈臺萬頃濬學府九流深  
談玄明毀壁拾紫陋羸金鷺濤開碧海鳳彩綴詞林  
林虛星華映水澈霞光淨霞水兩分紅川源四望通  
霧卷天山靜煙銷太史空鳥聲流向薄蝶影亂芳叢  
柳陰低墜水荷氣上薰風風月芳菲節物華紛可悅



將歡促席賞遽爾又歸別積水帶吳門通波連禹穴  
贈言雖欲盡機心庶應絕潘岳本自閑梁鴻不因熱  
一瓢欣狎遁三月聊棲拙棲拙隱金華狎遁訪仙楂  
放曠愚公谷消散野人家一頃南山豆五色東陵瓜  
野衣裁薜葉山酒酌藤花白雲離望遠青溪隱路賒  
儻憶幽巖桂猶冀折疎麻

在江南贈宋五之問

井絡雙源濬陽侯九派長淪波通地穴委輸下歸塘  
別島籠朝蜃連洲擁夕漲韞珠成積潤讓壁動浮光

浮光疑折水積潤踈圓吐玉輪涵地開劔匣連星起  
風煙標迥秀英靈信多美懷德踐遺芳端操慚謀已  
謀已認觀光牽迹強恓惶揆拙迷三雀勞生昧兩忘  
彈隋空歛笑獻楚自多傷一朝殊默語千里暴炎涼  
炎涼幾遷貿川陸疲臻湊積水架吳濤連山橫楚岫  
風月雖殊昔星河猶是舊姑蘇望南浦邨鄆通斗  
斗斗平生親南浦別離津瀟湘一超忽洞庭多苦辛  
秋江無綠芷寒汀有白蘋采之將何遺故人漳水濱  
漳濱已遼遠江潭未旋返為想短歌行當想長洲苑



露金薰芻岸風珮搖蘭坂蟬鳴稻葉秋鴈起蘆花晚  
晚秋雲日明亭臯風露清獨負平生氣空牽搖落情  
占星非聚德夢月詎懸名寂寥傷楚奏淒斷泣秦聲  
秦聲懷舊里楚奏悲無已郢路少叢臺叢臺富奇士  
溫輝凌麥日壯氣驚寒水一顧重風雲三冬足文史  
文史盛紛綸京洛多風塵猶輕五車富未重一囊貧  
李仙非易託蘇鬼曲難因不惜勞歌盡誰為聽陽春

詠懷古意上裴侍御

三十三餘罷髻是潘安仁四十九仍八年非朱買臣

縱橫愁繫越坎壈倦遊秦出籠窮短翮委轍涸枯鱗  
窮經不需用彈鋏欲誰申天子未驅策歲月幾沉淪  
輕生長慷慨效死獨殷勤徒歌易水客空老渭川人  
一得視邊塞萬里何苦辛劔匣胡霜影開弓漢月輪  
金方動秋色鐵騎想風塵為國堅誠款捐軀忘賤貧  
勒功思比憲決畧暗欺陳若不犯霜雪虛擲玉京春  
七言古詩

帝京篇

山河千里國城闕九重門不覩皇居壯安知天子尊



皇居帝里嶠函谷鷄野龍山侯甸服五緯連影集星  
躔八水分流橫地軸秦塞重關一百二漢家離宮三  
十六桂殿陰岑對玉樓椒房窈窕連金屋三條九陌  
麗城隈萬戶千門平旦開複道斜通鳩鵲觀交衢直  
指鳳凰臺劔履南宮入簪纓北闕來聲名冠寰宇文  
物象昭回鈎陳肅蘭祀璧沼浮槐市銅羽應風迴金  
莖承露起校文天祿閣習戰昆明水朱邸抗平臺黃  
扉通戚里平臺戚里帶崇墉炊金饌玉待鳴鐘小堂  
綺帳三千戶大道青樓十二重寶蓋雕鞍金絡馬蘭

窓繡柱玉盤龍繡柱璇題粉壁映鏘金鳴玉王侯盛  
王侯貴人多近臣朝遊北里暮南鄰陸賈分金將讌  
喜陳遵投轄尚留賓趙李經過密蕭朱交結親丹鳳  
朱城白日暮青牛紺憶紅塵度俠客珠彈垂楊道娼  
婦銀鈎采桑路娼家桃李自芳菲京華游俠盛輕肥  
延年女弟雙鳳入羅敷使君千騎歸同心結縷帶連  
理織成衣春朝桂樽樽百味秋夜蘭燈燈九微翠幌  
珠簾不獨映清歌寶瑟自相依且論三萬六千是寧  
知四十九年非古來榮利若浮雲人生倚伏信難分



馬賓王  
始見田竇相移奪俄聞衛霍有功勳未厭金陵氣先  
開石槨文朱門無復張公子灞亭誰畏李將軍相顧  
百齡皆有待居然萬化成應改桂枝芳氣已銷亡栢  
梁高宴今何在春去春來若自馳爭名爭利徒爾為  
久留卽署終難遇空鎖相門誰見知當時一旦擅豪  
華自言千載長驕奢倏忽搏風生羽翼湏臾失浪委  
泥沙黃雀徒巢桂青門遂種瓜黃金銷鑠素絲變一  
貴一賤交情見紅顏宿昔白頭新脫粟布衣輕故人  
故人有湮淪新知無意氣灰死韓安國羅傷翟廷尉  
已矣哉歸去來馬卿辭蜀多文藻楊雄仕漢乏良媒  
三冬自矜成足用十年不調幾遭迴汲黯薪逾積孫  
弘閣未開誰惜長沙傳獨負洛陽才

疇昔篇

少年重英俠弱歲賤衣冠旣託寰中賞方承膝下歡  
遨遊灞陵曲風月洛城端且知無玉饌誰肯逐金丸  
金丸玉饌盛繁華自言輕侮季倫家五霸爭馳千里  
馬三條競騫七香車掩映飛軒乘落照叅差步障引  
朝霞池中舊水繞懸鏡屋裏新粧不讓花意氣風雲



馬  
如昨歲月春秋屢迴薄上苑頻經柳絮飛中園幾  
遍梅花落當時門客今何在疇昔交遊已踈索莫教  
憔悴損容儀會得高秋雲霧廓淹留坐帝鄉無事積  
炎涼一朝披短褐六載奉長廊賦文慙昔馬執戟慕  
前楊揮戈出武帳荷筆入文昌文昌隱隱皇城裏由  
來奕奕多才子潘陸詞鋒絡繹飛張曹翰苑縱橫起  
卿相未曾識王侯寧見擬徒勞倦負薪何處逢知己  
判將運命賦窮通從來奇舛任西東不教永棄同芻  
狗且復飄飄類轉蓬容鬢年年異春花歲歲同榮親

未盡禮狗主欲申功脂車秣馬辭鄉國縈轡西南使  
邛棘玉壘銅梁不易攀地角天涯眇難測鶯轉蟬吟  
有悲望鴻來鴈度無音息陽關積霧萬里昏劔閣連  
山千里色蜀路何悠悠岷峯阻且脩迴腸隨九折迸  
淚連雙流寒光千里暮露氣一江秋長途看束馬平  
水且沉牛華陽舊地標神制石鏡娥眉真秀麗諸葛  
才雄已號龍公孫躍馬輕稱帝五丁卓犖多奇力四  
士英靈用文藝雲氣橫開八陣形橋影遙分七星勢  
川平煙霧開遊戲錦城隈壙高龜望出水淨鴈文迴



尋姝入酒肆訪客上琴臺不識金貂重偏惜玉山頽  
他鄉冉冉消年月帝里沉沉限城闕不見猿聲助客  
啼唯聞旅思將花發我家迢遞關山裏關山迢遞不  
可越故園梅柳尚有餘春來勿使芳菲歇解袂欲言  
歸執袂愴多違北梁俱握手南浦共霑衣別情傷去  
蓋離念惜光輝稍卯有何託木落有南飛平陸春來  
酒應熟相將園閣望青沂且用藤盃汎黃菊十年不  
調為貧賤百日屢遷隨倚伏祇為須求負郭田使我  
再干州郡祿百年鬱鬱少騰連萬里迢迢入鏡川涖

江沸潮衝白浪淮海長波遠接天叢竹凝朝露孤山  
起暝煙賴有邊城月常伴客旌懸東南美箭稱吳會  
名都隱軫三江外塗山執玉應昌期曲水開襟重文  
會仙鎬流音鳴鶴嶺寶劔分輝落蛟瀨未看白馬對  
蘆芻且覺浮雲似車蓋江南節序多文酒屢經過共  
踏春江曲俱唱采菱歌舟移疑入鏡棹舉若乘波風  
光無限極歸櫂礙池荷眺聽煙霞正流眄即從王事  
歸艫轉芝田花萼屢徘徊金谷春明重游衍登高南  
適嗤梁叟憑軾西征想潘掾岸開華岳聳疑蓮水激



龍門急如箭人事謝光陰俄遭霜露侵偷存七尺影  
分役九泉深窮途行泣玉憤路未藏金茹荼徒有歎  
懷橘獨傷心年來歲去成銷鑠懷抱心期漸寥落挂  
冠裂冕已辭榮南畝東臯事耕鑿賓階客院常踈散  
蓬徑柴扉終寂寞自有林泉堪隱棲何必山中事丘  
壑我住青門外家臨素澹濱遙瞻丹鳳闕斜望黑龍  
津荒衢通獵騎窮巷抵樵輪時有桃源客來訪竹林  
人昨夜琴聲奏悲調旭日含顰不成笑果乘駃馬蹇  
置書復道郎官稟綸誥冶長非罪曾縲紲長孺然灰

也經溺高門有閣不圖封峻筆無聞斂敷妙適離京  
兆謗還從御府彈炎威資夏景平曲况秋翰畫地終  
難入書空自不安吹毛未可待搖尾且求餐丈夫坎  
壘多怨疾契闊迤邐盡今日慎罰寧憑兩造辭嚴科  
直掛三章律鄒衍銜悲衡燕獄李斯抱怨拘秦格不  
應白髮頓成絲直為黃沙暗如漆紫禁終難叫朱門  
不易排驚魂聞葉落危魄逐輪埋霜威遙有勵雪柱  
更無階含冤欲誰道飲氣獨居懷忽聞驛使發關東  
傳道天波萬里通涸轍去鱗先逝海幽禽釋網便翔



空舜澤堯曦方有極讒言巧佞儻無窮誰能跼蹐依  
三輔會就商山訪四翁

行軍軍中行路難

君不見封狐雄虺自成群憑深負固結妖氛玉璽分  
兵徵惡少金壇授律動將軍將軍擁旌宣廟畧戰士  
橫戈靜夷落長驅一息背銅梁直指三危登劔閣閣  
道迢遙起戍樓劔門遙裔俯靈丘印關九折無平路  
江水雙源有急流征役無期返他鄉歲月晚杳杳丘  
陵出蒼蒼林薄遠途危紫蓋峯路澁青泥坂去去指

哀牢行行入不毛絕壁千里險連山四望高中外分  
區宇夷夏殊風土交趾枕南荒昆彌臨北戶川原饒  
毒霧谿谷多淫雨行潦四時流崩崖千歲古漂梗飛  
蓬不暫安捫藤引葛陟危巒昔時聞道從軍樂今日  
方知行路難滄江綠水東流駛炎州丹徼南中地南  
中南斗映星河秦關秦塞阻烟波三春邊地風光少  
五月瀘川瘴癘多朝驅疲斥堠夕息倦樵歌向月彎  
繁弱連星轉太阿重義輕生懷一顧東征西伐凡幾  
度夜夜朝朝斑鬢新年年歲歲戎衣故灞城隅滇池



水天涯望轉積地際行無已徒覺炎涼節物非不知  
關山千萬里棄置勿重陳征行多苦辛且悅清笳梅  
柳曲詎憶芳園桃李人絳節紅旗分日羽丹心白刃  
酬明主但令一被君王知誰憚三邊征戰苦行路難  
幾千端無復歸雲憑短翰空餘望日想長安

行路難

君不見玉關塵色暗邊庭銅鞮雜虜寇長城天子按  
劍徵餘勇將軍受服事橫行七德龍韜開玉帳千里  
鼙鼓疊金鉦陰山苦霧埋高壘交河孤月照連營連

營去去無窮極擁旆遙遙過絕國陣雲朝結晦天山  
寒沙夕漲迷疎勒龍鱗水上開魚貫馬首山前振鷗  
翼長驅萬里讐初連分麾三命武功宣百葦烏號遙  
碎柳七尺龍文迥照蓮春去秋來移灰琯蘭閨柳市  
芳塵斷鴈門迢遞尺書稀鴛被相思雙帶緩行路難  
誓令氛祲靜隼鷲但使封侯龍額貴詎隨中婦鳳樓  
寒

艷情代郭氏答盧照鄰

迢迢芊路望芝田眇眇函關限蜀川歸雲已落涪江



外還鴈應過洛水瀍洛水傍連帝城側帝宅層臺乘  
鳳翼銅駝路上柳千條金谷園中花幾色柳葉園花  
處處新洛陽桃李應芳春妾向雙流窺石鏡君住三  
川守王人此時離別那堪道此日空牀對芳沼芳沼  
徒遊比目魚幽徑還生拔心草涼風迴雪儻便娟驥  
子魚文實可憐擲果河陽君有分貨酒成都妾亦然  
莫言貧賤無人重莫言富貴應須種綠珠猶得石崇  
憐飛燕曾經漢皇寵良人何處醉縱橫直如循默守  
空名倒提新縑成懔懔翻將故劍作平平離前言夢

成蘭兆別後啼痕上竹生別日分明相約束已取宜  
家成誠勗當時擬弄掌中珠豈謂先摧庭際玉悲鳴  
五里無人問腸斷三聲誰為續思君欲坐望夫臺端  
居懶聽將離曲沉沉落日向山低簷前歸燕並頭棲  
抱膝當窓看夕兔側耳空房聽晚雞舞蝶臨堦祗自  
舞啼鳥逢人亦助啼獨坐傷孤枕春來悲更甚峨眉  
山上月如眉濯錦江中霞似錦錦字迴文欲贈君劍  
壁層峯自糾紛平江淼淼分青浦長路悠悠間白雲  
也知京洛多佳麗也知山岫遙虧蔽無那短封即踈



索不在長情守期契傳聞織女對牽牛相望重河隔  
淺流誰分迢迢經兩歲誰能脉脉待三秋情知唾井  
終無理情知覆水也難收不復下山能借問更向盧  
家字莫愁

代女道士王靈妃贈道士李榮

玄都五府風塵絕碧海三山波浪深桃實千年非易  
待桑田一變已難尋別有仙居對三市金闕銀宮相  
向起臺前鏡裏伴仙娥樓上簫聲隨鳳史鳳樓迢遞  
絕塵埃鶯時物色正徘徊靈芝紫檢參差長仙桂丹

花重疊開雙瞳綽約時遊陔三鳥聯翩報消息盡言  
真侶出遨遊傳道風光無限極輕花委砌惹香殘  
月窺牕覘幌色箇時無數併妖妍箇裏無窮總可憐  
別有衆中稱黜帝天上人間少流例洛濱仙駕啓遙  
源淮浦靈津符遠筮自言少小慕幽玄只言容易得  
神仙佩中邀勒經時序簫裏尋思復幾年尋思許事  
真情變二八容華識少選漫道燒丹止七飛空傳化  
石曾三轉寄語天上弄機人寄語河邊值楂客乍可  
忽忽共百年誰使遙遙期七夕想知人意自相尋果



得深心共一心一心一意無窮已投漆投膠非足擬  
只將羞澁當風流持此相憐保終始相憐相念倍相  
親一生一代一雙人不投丹心比玄石惟將濁水况  
清塵只言柱下留期信好欲將心學松蘿不能京兆  
畫蛾眉翻向成都騁騶引青牛紫氣度靈關尺素絕  
鱗去不還連苔上砌無窮綠脩竹臨壇幾處斑此時  
空牀難獨守此日別離那可久梅花如雪柳如絲年  
去年來不自持初言別在寒偏在何悞春來春更思  
春時物色無端緒雙枕孤眠誰分許分念嬌鶯一種

啼生憎燕子千般語朝雲旭日照青樓暉暉麗色滿  
皇州落花泛泛浮靈沼垂柳長長拂御溝御溝大道  
多奇賞侯客妖容過來往寶騎車花鐵作錢香輪鶯  
水珠為網香輪寶騎競繁華可憐今夜宿娼家鸚鵡  
杯中浮竹葉鳳凰琴裏落梅花許輩多情偏送款為  
問春花幾時滿千回鳥信說衆諸百過鶯啼說長短  
長短衆諸判不尋千回百過浪關心何曾舉意西鄰  
玉未肯留情南陌金南陌西鄰咸自保還轡歸期須  
及早為想三春狹斜路莫辭九折卽關道假令白里



似長安應使青牛學劍端。蘋風入馭來應易，竹杖成龍去不難。龍駿去去無消息，鸞鏡朝朝減容色。君心不記下山人，妾欲空期上林翼。上林三月鴻欲稀，華表千年鶴未歸。不分淹留乘路待，祇應直取桂輪飛。

五言律詩

在獄詠蟬

并序

余禁所禁垣西是法廳事也。有古槐數株焉，雖生意可知，同殷仲文之古樹聽訟，斯在。即周召伯之甘棠，每至夕照，低陰秋蟬，踈引發聲，幽息有切，嘗聞豈人

心異於曩時，將蟲響悲於前聽。嗟乎聲以動容，德以象賢，故潔其身也。稟君子達人之高行，斲其皮也。有仙都羽化之靈姿，候時而來，順陰陽之數，應節為變。審藏用之機，有目斯開，不以道昏而昧其視，有翼自薄，不以俗厚而易其真。吟喬樹之微風，韻資天縱，飲高秋之墜露，清畏人知。僕失路艱虞，遭時微縲，不哀傷而自怨，未搖落而先衰。聞蟋蟀之有聲，悟平反之已奏。見螳螂之抱影，怯危機之未安。感而綴詩，貽諸知己，庶情洽物，應哀弱羽之飄零。道寄人知，憫餘聲。



之寂寞非謂文墨取代幽憂云爾

西陸蟬聲唱南冠客思侵那堪玄鬢影來對白頭吟  
露重飛難進風多響易沉無人信高潔誰為表予心

遊紫雲觀贈道士

并序

余鄉國一辭江山萬里昔年離別還同塞北之鳧今  
日歸來即似遼東之鶴先生情均得免忘筌之契已  
深路是亡羊分岐之恨逾切不題短什何汰衷衿  
碧落澄秋景玄門啓曙關人疑列禦至客似令威還  
羽蓋徒忻仰雲車未可攀只應傾玉醴時許寄顏顏

渡瓜步派

搥檝辭幽徑鳴榔下貴洲驚濤疑躍馬積氣似連牛  
月迥黃沙淨風急夜江秋不學浮雲影他鄉空滯流

途中有懷

睠然懷楚奏悵矣背秦關涸鱗驚照轍陸羽怯虛鸞  
素服三川化烏裘十上還莫言無皓齒時俗薄朱顏  
至分水戍

行役忽離憂復此愴分流澗石迴湍咽繁叢曲澗幽  
陰崖常結晦宿莽競含秋况乃霜晨早寒風入戍樓



望鄉夕泛

歸懷到不安促榜犯風濶落宿含樓近浮月帶江寒  
喜逐行前至憂從望裏寬今夜南枝鵲應無繞樹難  
久客臨海有懷

天涯非日觀地屺望星樓練光搖亂馬劔氣上連牛  
草濕姑蘇夕葉下洞庭秋欲知悽斷意江上涉安流  
遊宛部逢孔君自衛來欣然相遇若舊

遊人自衛返背客隔淮來傾蓋金蘭合忘筌玉葉開  
繁花明日柳疎蒨落風梅將期重交態時耐不然灰

西京守歲

閑居寡言晏獨坐慘風塵忽見嚴冬盡方知列宿春  
夜將寒色去年共曉光新耿耿他鄉夕無由展舊親

白雲抱幽石

重巖抱危石幽澗曳輕雲繞鎮仙衣動飄蓮羽蓋分  
錦色連花靜苔光帶葉薰詎知吳會影長抱穀城文

春雲處處生

千里年光靜四望春雲生暫日祥光舉踈雲瑞葉輕  
蓋陰籠迴樹陣影抱危城非將吳會遠飄蕩帝鄉情



同辛簿簡仰酬思玄上人林泉四首

聞君招隱地 髣髴武陵春  
緝艾知還楚 披榛似避秦  
崩查年祀積 幽草歲時新  
一謝滄浪水 安知有逸人

其二

芳晨臨上月 幽賞狎中園  
有蝶堪成夢 無羊可觸藩  
忘懷南澗藻 觸思北堂萱  
坐歎華滋歇 思君誰為言

其三

林泉恣探歷 風景輒徘徊  
客有遷鶯處 人無結駟來  
聚花如薄雪 沸水若輕雷  
今日徒招隱 終知異鑿垓

其四

俗遠風塵隔 春還初服遲  
林疑中散地 人似上皇時  
芳杜湘君曲 幽蘭楚客詞  
山中有春草 長以寄相思

秋日送陳文林陸道士

青牛遊華岳 赤馬走吳宮  
玉柱離鴻怨 金壘浮蟻空  
日霽嶠陵雨 塵起洛陽風  
唯當玄度月 千里與君同

送鄭少府入遼

邊烽警榆塞 俠客度桑乾  
柳葉開銀鑄 桃花照玉鞍  
滿月臨弓影 連星入劍端  
不學燕丹客 空歌易水寒



送費六還蜀

星樓望蜀道月破指吳門萬行流別淚九折切驚魂  
雪影含花落雲陰帶葉昏還當三徑晚獨對一清尊

秋日送侯四

我留安豹隱君去學鵬搏岐路分襟易風雲促膝難  
夕漲流波急秋山落日寒惟有思歸引悽斷為君彈

秋日送尹大赴京

掛瓢余隱舜負鼎爾干湯竹葉離樽滿桃花別路長  
低河耿秋色落月抱寒光素書如可嗣幽谷行賓行

秋夜送閻五

通莊抵舊里溝水泣新知斷雲飄易滯連露積難披  
素風啼迥蝶驚月繞疎枝無力勵短翰輕舉送長離

送王明府上京叅選

振衣遊紫府飛蓋背青田虛心恒警露孤影尚陵煙  
離歌悽妙曲別引繞繁絃在陰如可和清響會聞天

秋日送別

寂寥心事晚搖落歲時秋共此傷華髮相看惜去留  
當歌應破涕哀命返窮愁別後能相憶東陵有故侯



別李嶠

芳尊徒自滿，別恨轉難勝。客似遊江岸，人疑上灞陵。  
寒更承夜永，涼景向秋澄。離心何以贈，自有玉壺冰。  
在兗州餞宋五之問

淮尼泗水地，梁甫汶陽東。別路青驪遠，離尊綠蟻空。  
柳寒凋密翠，棠晚落疎紅。別後相思曲，淒斷入琴風。

遊靈公觀

靈峯標勝境，神府枕通川。玉殿斜臨漢，金堂迴架煙。  
斷風疎晚竹，流水切寒絃。別有青門外，空懷玄圃仙。

夏日遊山家同夏少府

返照下層岑，物外狎招尋。蘭徑薰幽佩，槐庭落暗金。  
谷靜風聲徹，山空月色深。一遣樊籠累，唯餘松桂心。  
初秋登司馬樓宴

展驥端居暇，登龍嘉宴同。締賞三清滿，承歡六義通。  
野晦寒陰積，潭虛夕照空。顧慚非夢鳥，濫此廁雕蟲。  
初秋於六宅宴

千里風雲契，一朝心賞同。意盡深交洽，神靈俗累空。  
草帶銷寒翠，花枝發夜紅。唯將淡若水，長揖古人風。



冬日宴

二三物外友一百杖頭錢賞洽袁公地情披樂令天  
促膝鸞觴滿當爐獸炭然何須攀桂樹逢此自留連

鏤鷄子

幸遇清明節欣逢舊練人刻花爭臉態寫月競眉新  
暈罷空餘月詩成併道春誰知懷王者含響未吟晨

詠雲酒

朔空曾紀曆帶地舊疏泉色泛臨邛瑞香流赴蜀仙  
欸交欣散三洽友悅沉錢無復中山賞空吟吳會篇

詠美人在天津橋

美女出東鄰容與在天津動衣香滿路移步襪生塵  
水下看粧影眉頭画月新寄言曹子建箇是洛川神  
憲臺出繫寒夜有懷

送郭少府

獨坐懷明發長謠苦未安自應迷北叟誰肯問南冠  
生死交情異殷憂歲序闌空餘朝夕鳥相伴夜啼寒  
開筵抗德水輟棹艤仙舟貝闕桃花浪龍門竹箭流  
當歌悽別曲對酒泣離憂還望青門外空見白雲浮



錢駱四二首

平生何以樂斗酒夜相逢曲中驚別緒醉裏失愁容  
星月懸秋漢風香入曙鐘明日臨溝水青山幾萬重

其二

甲第驅車入良宵秉燭遊人追竹林會酒獻菊花秋  
霜吹飄無已星河漫不流重嗟歡賞地翻召別離憂  
冬日過故人任處士書齋

神交尚投漆虛室罷遊蘭網積窓文亂苔深履迹殘  
雪明書帳冷冰靜墨池寒獨此琴臺上流水為誰彈

塵灰

洛川流雅韻秦道擅苛威聽歌梁上動應律管中飛  
光飄神女襪影落羽人衣願言心未翳終冀效輕微

秋晨同淄川毛司馬秋九詠

紫陌炎氛歇青蘋晚吹浮亂竹搖踈影縈池織細流  
飄香曳舞袖帶粉泛粧樓不分君恩絕紈扇曲中秋

秋雲

南陸銅渾改西郊玉葉輕泛斗搖光動臨陽瑞色明  
蓋陰連鳳闕陣影翼龍城誰知時不遇空傷流滯情



秋蟬

九秋行已暮一枝聊暫安  
隱榆非諫楚噪柳異悲潘  
分形粧薄髻鏤貌飾危冠  
自憐踈影斷霜林夕吹寒

秋露

玉關寒氣早金塘秋色歸  
泛掌光逾淨添荷滴尚微  
變霜凝曉液承月委圓輝  
别有吳臺上應濕楚臣衣

秋月

雲披玉繩淨月滿鏡輪圓  
裛露珠暉冷凌霜桂影寒  
漏彩含踈薄浮光漾急瀾  
西園徒自賞南飛終未安

秋水

金闕寒流徹玉輪秋浪清  
圖雲錦色淨寫月練花明  
泛曲鷗絃動隨軒鳳轄驚  
唯當御溝上悽斷送歸情

秋螢

玉札分靜夜金螢照晚涼  
含輝疑泛月帶火怯凌霜  
散彩縈虛牖飄花繞洞房  
下帷如不倦當解惜餘光

秋菊

擢秀三秋晚開芳十步中  
分黃俱笑日含翠共搖風  
碎影隨流動浮香隔岸通  
金翹徒可泛玉笋竟誰同



秋鴈

聯翩辭海曲，遙曳指江干。陣去金河冷，書歸玉塞寒。  
帶月凌空易，迷煙逗浦難。何當同顧影，刷羽泛清瀾。

詠水

列名通地紀，疏派合天津。波隨月色淨，態逐桃花春。  
照霞如隱石，映柳若沉鱗。終當挹上善，屬意淡交人。

詠鴈

淒藻蒼梧遠，銜蘆紫塞長。霧深迷晚景，風急斷秋行。  
陣照通宵月，書封幾夜霜。無復能鳴分，空知愧稻梁。

詠雪

龍雲靈葉上，鶴雪瑞花新。影亂銅烏吹，光銷玉馬津。  
含輝明素篆，隱迹表祥輪。幽蘭不可儷，徒自繞陽春。

王昭君

歛容辭豹尾，絨怨度龍鱗。金鈿明漢月，玉筋染胡塵。  
古鏡菱花暗，愁眉柳葉顰。唯有清笳曲，時聞芳樹春。

樂大夫挽詞五首

可歎浮生促，吁嗟此路難。丘陵一起恨，言笑幾時歡。  
蕭索郊坰晚，荒涼井陘寒。誰當門下客，獨見有任安。



其二

蒿里誰家地松門何代丘百年三萬日一別幾千秋  
返照寒無影窮泉凍不流居然同物化何處欲藏舟

其三

昔去梅花發今來薤露晞彤駟朝帝闕丹旌背王畿  
城郭猶疑是園陵稍覺非九原如可作千載與誰歸

其四

一旦先朝菌千秋掩夜臺青鳥新兆去白馬故人來  
草露當春泣松風起暮哀寧知荒隴外弔鶴自徘徊

其五

忽見泉臺路猶疑水鏡懸何如開白日非復覩青天  
華表迎千歲幽局送百年獨嗟流水引長掩伯牙絃

丹陽刺史挽詞三首

百齡嗟倏忽一旦附山阿丹桂銷已盡青松衰思多  
薰風虛聽曲薤露反成歌自有藏舟處誰憐隙駟過

其二

惻愴恒山羽留連棗萼篇佳城非舊日京兆即新阡  
城郭三千歲丘陵幾萬年唯餘松柏隴朝夕起寒煙



其三

短歌三獻曲長夜九泉臺此室玄扃掩何年白日開  
荒郊踈古木寒隊積陳芟獨此傷心地松聲薄暮來

送劉少府遊越州

一丘余枕石三越爾懷鈇離亭分鶴蓋別岸指龍川  
露下蟬聲斷寒來鴈影連如何溝水上悽悽聽繁絃

從軍行

平生一顧念意氣溢三軍野日分戈影天星合劔文  
弓絃抱漢月馬足踐胡塵不求生入塞惟留死報君

稱心寺

征帆恣遠尋逶迤過稱心凝滯蘅蒹蒨岬泐泗橋柚林  
穿淑不厭曲艤潭唯愛深為樂凡幾許聽取舟中琴

陪潤州薛司空舟徒桂明府遊招隱寺

共尋招隱寺初識戴顓家還依舊泉壑應改昔雲霞  
綠竹寒天笋紅蕉臘月花金繩倘留客為繫日光斜

出石門

層巖遠接天絕嶺上棲煙松低輕蓋偃藤細弱鈎懸  
石明如掛鏡苔分似列錢暫策為龍杖何處得神仙



至分陝

陝西開勝壤邵南分沃疇  
列樹巢維鵲平渚下睢鳩  
憇棠疑忽剪曳葛似攀膠  
至今王化美非獨在隆周

杜眺春陵

攬轡疲宵邁驅馬倦晨興  
旣出封泥谷還過避雨陵  
山行明照上谿宿密雲蒸  
登高徒欲賦詞殫獨撫膺

夏日遊目聊作

暫屏囂塵累言尋物外情  
致逸心逾默神幽體自輕  
浦夏荷香滿田秋麥氣清  
詎假滄浪上將濯楚臣纓

同崔駙馬曉初登樓思京

麗譙通四望繁憂起萬端  
綺跡低晚魄鏤檻肅初寒  
白雲鄉思遠黃圖歸路難  
唯餘西向笑暫似當長安

月夜有懷簡諸同病

閒庭落景盡踈簾  
夜月通山靈響似應水  
淨望如空棲枝猶繞鵲  
導渚未來鴻可歎  
高樓婦悲思杳難終

春夜常明府宅宴

酌桂陶芳夜披薜蕭幽人雅  
琴馴魯雉清歌落范塵  
宿雲低迴蓋殘月上  
虛輪幸此承恩洽聊當故鄉人



送宋五之問得涼字

願言游泗水支離去二漳道術君所薦筌蹄余自忘  
雪威侵竹冷秋爽帶池涼欲驗離襟切岐路在他鄉

五言排律

浮槎

并序

遊目川上觀一浮槎泛泛然若木偶之乘流迷不知  
其所適也觀其根柢盤屈枝幹扶踈大則有棟梁舟  
楫之材小則有輪轆榘桷之用非夫稟乾坤之秀氣  
含宇宙之淳精孰能負凌雲際日之姿抱積雪封霜

之骨向使懷材幽藪藏穎重嶠絕望於廊廟之榮遺  
形於斤斧之患固可垂蔭萬畝懸映九霄與建木較  
其短長將大椿齊其年壽者而委根險岸託質畏塗  
上為疾風衝颺所摧殘下為奔浪迅波所激射基由  
壤括勢以地危豈盛衰之理繫乎時封植之道存乎  
我一墜泉谷萬里飄淪與波浮沉隨時逝止雖殷仲  
文歎生意已盡孔宣父知朽質難雕然而遇良工逢  
仙客牛礪可託玉璜之路非遙匠石先談萬乘之器  
何遠故材與不用時也悲夫然知萬物之相應感者



亦奚必同聲同氣而已哉感而賦詩貽諸同疾云爾  
昔負千尋質高臨九仞峯貞心凌晚桂勁節掩寒松  
忽值風颺折坐為波浪衝摧殘空有恨臃腫遂無庸  
渤海三千里泥沙幾萬重似舟飄不定如梗泛何從  
仙客終難託良工豈易逢徒懷萬乘器誰為一先容

春霽早行

年華開早律霽色蕩芳晨城闕千門曉山河四望春  
御溝通太液戚里對平津寶瑟調中婦金壘引上賓  
劇談推曼倩驚座揖陳遵意氣一言合風期萬里親

自惟安直道守拙忘因人談器非先木圖榮異後薪  
擲揄慚路鬼憔悴切波臣玄草終疲漢烏裘幾滯秦  
生涯無歲月岐路有風塵還嗟太行道處處白頭新

晚度天山有懷京邑

忽上天山路依然想物華雲疑上苑葉雪似御溝花  
行嘆戎麾遠坐令衣帶賒交河浮絕塞弱水浸流沙  
旅思徒漂梗歸期未及瓜寧知心斷絕夜夜泣胡笳

晚泊河曲

三秋倦行役千里泛歸潮通波竹箭水輕舸木蘭橈



金隄連曲岸貝闕影浮橋水淨千年近星飛五老遙  
疊花開宿浪浮葉下涼颺浦荷疎晚的津柳漬寒條  
恹惶勞梗泛悽斷倦蓬飄仙查不可託河上獨長謠

晚泊蒲類津

二庭歸望斷萬里客心愁山路猶南屬河源自北流  
晚風連朔氣新月照邊秋竈火通軍壁烽煙上戍樓  
龍庭但苦戰燕頷會封侯莫作蘭山下空令漢國羞

早發淮口望盱眙

養蒙分四瀆習坎奠三荆徙帝留餘地封王表舊城

岸昏涵蜃氣潮滿應鷄聲洲迥連沙靜川虛積溜明  
一朝從捧檄千里倦懸旌背流桐栢遠逗瀟木蘭輕  
小山迷隱路大塊切勞生唯有貞心在獨映寒潭清  
遠使海曲春夜多懷

長嘯三春晚端居百慮盈未安蝴蝶夢遽切魯禽情  
別島連寰海離魂斷戍城流星疑伴使明月似依營  
懷祿寧期達牽時匪狗名艱虞行已遠時迹自相驚  
早發諸暨

征夫懷遠路夙駕上危巒薄煙橫絕巘輕凍澁迴湍



野霧連空暗山風入曙寒帝城臨灞涘禹穴枕江干  
橘性行應化蓬心去不安獨掩窮途淚長歌行路難

過張平子墓

西鄂該通理南州擅德音玉卮浮藻麗銅渾積思深  
忽懷今日昔非復昔時今日往豐碑閣風來古木吟  
惟歎窮泉下終鬱羨魚心

海曲書情

薄遊倦千里勞生負百年未能查上漢詎肯劔遊燕  
白雲照春海青山橫曙天江濤讓雙壁渭水擲三錢

坐惜風光晚長歌獨塊然

邊城落日

紫塞流沙北黃圖灞水東一朝辭俎豆萬里逐沙蓬  
候月恒持滿尋源屢鑿空野昏邊氣合烽迴戍煙通  
膂力風塵倦疆場歲月窮河流控積石山路遠崆峒  
壯志凌蒼兕精誠貫白虹君恩如可報龍劔有雌雄

蓬萊鎮

旅客春心斷邊城夜望高野樓凝海氣白鷺似江濤  
結縷疲三入承冠泣二毛將飛憐弱羽欲濟乏輕舠



賴有陽春曲窮愁且代勞

宿温城望軍營

虜地寒膠折邊城夜柝聞  
兵符聞帝闕天策動將軍  
戍靜胡笳徹沙明楚練分  
風旗翻翼影霜劍轉龍文  
白羽搖如月青山斷若雲  
煙踈疑卷幔塵滅似銷氛  
投筆懷班業臨戎想顧勲  
還應雪漢耻持此報明君

和孫長史秋日卧病

霍地踈天府潘園近帝臺  
調絃三婦至置驛五侯來  
尚想歡娛洽吁嗟歲月催  
金壇分上將玉帳引瓌材

決勝鯨波靜騰謀鳥谷開  
白雲淮水外紫陌灞陵隈  
節變驚衰柳笳繁思落梅  
調神和王燭挾藻握珠胎  
悵矣欣懷土居然欲死灰  
還因承雅曲暫喜躍沉鯁

四月八日題七級

化城分鳥堞香閣俯龍川  
複棟侵黃道重簷架紫煙  
銘書非晉代壁畫是梁年  
霸略今何在王宮尚巋然  
二帝曾遊聖三卿是偶賢  
昔茲遊勝侶超彼託良緣  
我出有為界君登非想天  
悠悠青曠裏蕩蕩白雲前  
今日經行處曲音號蓋煙



早秋出塞寄東臺詳政學士

促駕逾三水長驅望五原天街分斗極地理接樓煩  
溪月明關隴胡雲聚塞垣山川殊物候風壤異涼溫  
戍古秋塵合沙寒宿霧繁昔余迷學步投迹忝詞源  
瀛島延蘭閣蓬山欵禁園影纓陪綬冕載筆偶璵璠  
汲冢寧詳蠹秦牢詎辨冤一朝從篋服千里駕輕軒  
鄉夢隨魂斷邊聲入聽喧南圖終歛翮北土遽摧轅  
吊影慚連茹浮生倦觸藩數奇何以託桃李自無言

鄭安陽入蜀

彭山折坂外井絡少城隈地是三巴俗人非百里才  
長途君悵望別路我徘徊心賞風煙隔容華歲月催  
遙遙分鳳野去去轉龍媒遺錦非前邑鳴琴即舊臺  
劔門千仞起石路五丁開海客乘查渡仙童馭竹迴  
魂將離鶴遠思逐斷猿哀唯有雙鳧鳥飛去復飛來

在軍中贈先還知己

蓬轉俱行役瓜時獨未還魂迷金闕路望斷玉門關  
獻凱多慙霍論功幾謝班風塵催白首歲月損紅顏  
落鴈低秋塞驚鳧起暝灣胡霜如劔鏑漢月似刀環



別後邊庭樹相思幾度攀

和李明府

傳聞葉縣履飛向洛陽城馳道臨層掖津門對小平  
霞殘疑製錦雲度似飄纓藻揆潘江澈塵虛范甑清  
詎憐衝斗氣猶向匣中鳴

望月有所思

九秋涼風肅千里月華開圓光隨露湛碎影逐波來  
似霜明玉砌如鏡寫珠胎曉色依關近邊聲雜吹哀  
離居分照耀怨緒共徘徊自繞南飛羽空忝北堂才

送吳七遊蜀

日觀分齊壤星橋抵蜀門桃花嘶別路竹葉瀉離樽  
夏盡蘭猶茂秋深柳尚繁霧銷山望迴風高野聽喧  
勞歌徒欲奏贈別竟無言唯有當秋月空照野人園

西行別東臺詳政學士

意氣坐相親關河別故人客似秦川上歌從易水濱  
塞荒行辨玉臺遠尚名綸洩井懷邊將尋源重漢臣  
上苑梅花早御溝楊柳新只應持此曲別作邊城春  
春晚從李長史遊開道林故山



幽尋極幽壑春望陟春臺雲光棲斷樹靈影入仙杯  
古藤依格上野徑約山隈落葉翻風去流鶯滿樹來  
興闌荀御動歸路起浮埃

和王記室從趙王春日遊陀山寺

鳥旛陪訪道鷲嶺洽棲真四禪明淨業三空廣勝因  
祥河踈疊澗惠日皎重輪葉暗龍宮密花明鹿苑春  
雕談筌奧旨妙辯漱玄津雅曲終難和徒自奏巴人

冬日野望

故人無與晤安步陟山椒野靜連雲捲川明斷霧銷

靈巖聞曉籟洞浦漲秋潮三江歸夢杳千里故鄉遙  
勞歌徒自奏客魂誰為招

夕次舊吳

維舟皆楚服振策下吳畿盛德弘三讓雄圖枕九圍  
黃池通霸業赤壁暢戎威文物俄遷謝英靈有盛衰  
行歎鷗夷沒遽惜湛盧飛地古烟塵暗年深館宇稀  
山川四望是人事一朝非懸劔空留信亡珠尚識機  
鄭風遙可託關月眇難依西北雲逾滯東南氣轉微  
徒懷伯通隱多謝買臣歸唯有荒臺路薄暮濕征衣



過故宋

舊國千年盡荒城四望通雲浮非隱帝日舉類遊童  
綺琴朝化冷祥石夜論空馬去遙奔鄭蛇分近帶豐  
池文歛東水竹影漏寒叢園兔承行月川鷗避斷風  
故宋誠難定從梁事未工唯當過周客獨愧吳臺空

秋日山行簡梁大官

乘馬陟層阜回首睇山川攢峯銜宿霧疊嶽架寒烟  
百重含翠色一道落飛泉香吹分巖桂鮮雲抱石蓮  
地偏心易遠致默體逾玄得性寧遊刃忘言已棄筌

彈冠勞巧拙結綬倦牽纏不如從四皓丘中鳴一絃

晚泊江鎮

四運移陰律三翼泛陽侯荷香銷晚夏菊氣入新秋  
夜烏喧粉堞宿鴈下蘆洲海霧籠邊徼江風繞戍樓  
轉蓬驚鶴渚逃名謝曦立還嗟帝鄉遠空望白雲浮

晚度黃河

千里尋歸路一葦辭平原通波連馬頰迸水急龍門  
照日榮光渾驚風瑞浪翻棹唱臨風斷樵謳入聽喧  
岸迥秋霞落潭深夕霧繁誰堪逝川上日暮他鄉魂



晚憇田家

轉蓬勞遠役披薜下田家山形類九折江勢急三巴  
懸梁接斷岸澀路擁崩杳霧巖淪曉魄風淑漲寒沙  
心迹一朝舛關山萬里賒龍章徒表越閩俗本非華  
旅行悲泛梗離贈斷踈麻唯有寒潭菊獨似故園花

宿山庄

金陵一超忽玉燭幾還周露積吳臺草風入郢門楸  
林虛宿斷霧磴險掛懸流拾青非漢策緇化類秦裘  
牽迹猶多蹇勞生未寡尤獨此他鄉夢空山明月秋

夏日夜憶張二

伏枕憂思深擁膝獨長吟烹鯉無尺素筌魚勞寸心  
踈麻空有折芳桂湛無斟廣庭含夕氣閑宇澹虛陰  
織蟲垂夜砌驚鳥棲暝林驩娛百年促羈病一生侵  
詎堪孤月夜流水入鳴琴

寓居洛濱對雪憶謝二

旅思眇難裁衝飈限易哀曠望洛川晚飄飄瑞雪來  
積彩明書帳流韻繞琴臺色奪迎仙羽花避犯靈梅  
謝庭賞方逸袁扉掩未開高人儻有訪興盡詎須迴



叙寄負半千

薄宦三河道自負十餘年不應驚若厲祇為直如弦  
坐歷山川險吁嗟陵谷遷長吟空抱膝短翮詎冲天  
魂歸滄海上望斷白雲前釣名勞拾紫隱迹自談玄  
不學多能聖徒思鴻寶仙斯志良難已此道豈徒然  
嗟為刀筆吏耻從繩墨牽岐路情雖狎人倫地本偏  
長揖謝時事獨往訪林泉寄言二三子生死不來旋

靈隱寺

鷲嶺鬱岩堯龍宮鎖寂樓觀滄海日門對浙江潮

桂子月中落天香雲外飄捫蘿登塔遠剝木取泉遙  
霜薄花更發冰輕葉互凋夙齡尚遐異搜對滌煩囂  
待入天台路看余度石橋

寒夜獨坐遊子多懷簡知已

故鄉眇千里離憂積萬端鶉服長悲碎蝸廬未卜安  
富鈎徒有想貧鋏為誰彈柳秋風葉脆荷晚露文團  
晚金叢岸菊餘佩下幽蘭伐木傷心易維乘歸去難  
獨有孤明月時照客庭寒

傷祝阿王明府并序



夫心之悲矣非關春秋之氣聲之哀也豈移金石之音何則事感則萬緒興端情應則百憂交軫是以宣尼舊館流襟動激楚之悲孟嘗高臺承睫下聞琴之淚祝阿王明府毓德丹穴襲吉黃裳靈基峙金闕之峯層源瀨玉輪之坂旣而鴻飛漸陸將騁平輿之龍鶴鳴在陰爰絆朝歌之驥乃當名懸闕月德貫陳星豈徒遽切夢瓊掩沉連石嗟乎輪銷桂魄驪珠毀貝闕之前斗散紫氛龍劍沒延平之水某昔承嘉惠曲荷恩光留連嘯歌從容風月撫心陳迹泣血漣如然

而始終者萬物之大歸生死者百年之常分雖則知理之可有而未曉情之可無聊綴悲歌敢貽同好諸君或締交三益列宰一司或叶契筌蹄投心膠漆如比肩於千里遽傷魂於九原旣切芝焚彌深蕙歎盍言四始同賦七哀庶蘭室流薰襲遺芳而化德故蓬心申拙效庸音於起予觸目多懷周增流慟洛川真氣上重泉惠政融合章光後列繼武嗣前雄契與良難驗生涯忽易窮翔鳧猶在履狎雉尚馴童錢滿荒階綠塵浮虛帳紅夏餘將宿草秋近未驚蓬



煙晦泉門夕日遠夜臺空誰堪孤隴外獨聽白楊風

詠懷

少年識事淺不知交道難一言芬若桂四海臭如蘭  
寶劔思存楚金鉞許報韓虛心徒有託循迹諒無端  
太息關山險吁嗟歲月闌忘機殊會俗守拙異懷安  
阮籍空長嘯劉琨獨未懽十步庭芳歛三秋隴月團  
槐疎非盡意松晚夜凌寒悲調絃中急窮愁醉裏寬  
莫將流水引空向俗人彈

邊夜有懷

漢地行逾遠燕山去不窮城荒猶築怨碣毀尚銘功  
古戍煙塵滿邊庭人事空夜關明隴月秋塞急胡風  
倚伏良難定榮枯豈易通旅魂勞泛梗離恨斷征蓬  
蘇武封猶薄崔駟官不工惟餘北叟意欲寄南飛鴻  
久戍邊城有懷京邑

擾擾風塵地遑遑名利途盈虛一易舛心迹兩難俱  
弱齡小山志寧期大丈夫九微光賁玉千仞忽彈珠  
棘寺游三禮蓬山蓋八儒懷鉛慚後進投筆願前驅  
北走非通趙西之似化胡錦車朝促候斗夜傳呼



戰士青絲絡將軍黃石符連星入寶劍半月上彫弧  
拜井開竦勒鳴桴動密須戎機習短蔗祇浸靜長榆  
季月炎初盡邊庭草早枯層陰籠古木窮色變寒蕪  
海鶴聲嘹唳城烏尾畢逋葭繁秋引色桂滿夕輪孤  
行役風霜久鄉園夢想殊灞池遙夏國秦海望陽紆  
沙塞三千里京城十二衢楊溝連鳳闕槐路擬鴻都  
璧殿規宸象金隄法斗樞雲浮西北蓋月照東南隅  
寶帳垂連理銀牀轉鹿盧廣筵留上客豐饌引中厨  
漏緩金徒箭嬌繁玉女壺秋濤飛喻馬春水泛仙臚

意氣風雲合言忘道術趨共矜名已泰詎肯沫相濡  
有志慙雕朽無庸類散樗聞山漸超忽形倦歎艱虞  
結網空知羨圖榮豈自誣忘情同塞馬比德類宛駒  
隴阪肝腸絕陽關亭隴迂迷魂驚落鴈離恨斷飛鳧  
春去榮華盡年來歲月無邊愁傷郢調鄉思繞吳歛  
河氣通中國山途限外區相思若可寄冰泮有銜蘆

幽繫書情通簡知已

昔歲逢陽曆觀光賁楚材穴疑丹鳳起場似白駒來  
一命淪騷餌三緘慎禍胎不言勞倚伏忽此遘遭迴



駢馬刑章峻蒼鷹獄吏猜爭縑非易辨疑壁果難裁  
擦拙慙周道端憂滯夏臺生涯一滅裂岐路幾徘徊  
青陸芳春動黃沙旅思催圓扉長寂寂踈網尚恢恢  
入窅先搖尾迷津正曝顯覆盆徒望日蟄戶未驚雷  
霜歇蘭猶敗風多木屢摧地幽蠶室閉門靜雀羅開  
自憫秦冤痛誰憐楚奏哀漢陽窮鳥客梁甫卧龍才  
有氣還衝斗無時會鑿坏莫言韓長孺長作不然灰

棹歌行

寫月圖黃罷凌波拾翠通鏡花搖芰日夜麝入荷風

葉露舟難蕩蓮踈浦易空鳳媒羞自託鴛翼恨難窮  
秋帳澄光翠倡樓粉色紅相思無別曲併在棹歌中

五言絕句

在軍登城樓

城上風威險江中水氣寒戎衣何日定歌舞入長安  
臨易水送人

送別

此地別燕丹壯士髮衝冠昔時人已沒今日水猶寒  
寒更承夜永涼夕向秋澄離心何以贈自有玉壺冰



詠照鏡

寫月無芳桂照面有花菱不持光謝水翻將影學冰

挑燈杖

稟質非貪熱焦心豈憚熬終知不自潤何處用脂膏

詠塵

凌波起羅襪含風染素衣別有知音調聞歌應自飛

翫初月

忌滿光恒缺乘昏影暫流自能明似鏡何用曲如鉤

七言絕句

憶蜀地佳人

東西吳蜀關山遠魚來鴈去兩難聞莫怪常有千行淚只為陽臺一片雲

雜言

詠鵝時年七歲

鵝鵝鵝仰面向天歌白毛浮綠水紅掌撥清波

